

RONE MOHAMED

Rene Védrine

San 18nan - Awirilikalo - san 1990  
A songo : DOROME 10 - N° 219

# Kibaru

a bë bò kalo o kalo "AMAP" ka yamaruya kònò

1979

UDPM

1990

fasojama tonba

ye san 11 soro

Malidenw n'u dembagaw bee belajelen benna


baarako

boloda

cogo

Mali

kono



feere 50

latigeli

wari

layidu

tara

baarakeyorow ni baarakelaw bëna caya

( a bë ne 8 la )

# Ka bɔ Mali balikukalan baarada " DNAFLA " la

## Hakilijakabo

«N'i ka kan tilal'i la, o y'i danbe bérèbérè dò tilalen y'i la. Yèrètā sinsinbere dò ye yèrèkanfò ye», an ka poyisèbènna dò ko ten. Ne hakilima filè nin ye o kuma kan. Ka kan wèrè kalan, o ka nyi. K'i fakan lagosi kan wèrè ye, o ye jonya taamas-hiyèn ye. Danbe dun tè jòn na jòn ta t'a yèrè ye. Fakan laboli ka di wa ?N'an ye waati témènenw lajè, tubabukan dòròn de tun bè sanga la an ka jamana kònò. N'i t'a mèn, i tè jate, tana t'i la, bòkun t'i la. Nka o bée la an tun bè nyaga k'an y'an yèrè, hòrònya. Ee ! ka maloya i ka kan fòli la, ka dèsè k'a sèbèn, k'a kalan, k'e y'i yèrèta ! hun ! o tè faamu. Walasa k'an ka yèrèta sinsin, walasa an ka to an suguya la, nyèmògòw ye fèerèw siri an kanw labatoli kama. Bibi in na, anka kan dòw bè sèbèn, u bè kalan duguw kònò ani kalanyòròw la. Cikèla, mònnikèla, baganmarala ni jagokèla caman ye faamuya sòrò u ka baara la.

O la, tinyè bè poyisèbènna in fè. N'an tora kanko in sira kan, an danbe n'an ka hòrònya na t'u cogo la.

Simeyòn Samake  
Lakòlikaramògò, Masala  
Kulukòrò

## Kalanbaliya kèle

A' ye wuli  
Ni min dalen don, o k'i sigi  
Ni min sigilen don, o ka wuli  
k'i jò  
Ni min jòlen don, o k'i cèsiri  
Ka fasokanw kè an ka baa raminèn ye.

A' ye wuli  
Sèbè Tuma sera  
Kunfinya dugatumura sera  
Jonya juru tigètumura sera  
Nanbara ni binkanni bantu ma sera.

Nyègontadun ni yuruguyuru  
gu silatunutuma sera  
Bawo fasokanw dònni bène  
kè yeelen ye  
Min bène an bò dibi la  
A' ye wuli  
Ka kalan kè  
Kalan de ye faantanya kèle  
minèn ye.

Kalan de ye mògò halala ye  
Kalan bè yèrèmahòrònya  
sèmèntiya.

Kalan bè nyètaa jiidi  
Kalan bè yèrèta sabati  
Wa, n balimaw, kalan bè  
sòrò yiriwa  
An bée ka kalan  
N'o tè an bè nimisa don dò

Numuso KABA  
Darawela, sira 120 x 135  
Bamako

## Yèlèma bè ka don " KIBARU " sèbèncogo la dòonin dòonin

Mògò minnu bè «KIBARU» kalan kabini san 1972, olu ka kan k'a dòn ko «KIBARU» ye balikukalan dafalan ye.

O siratigè la, ni Mali Balikukalansoba ye yèlèma min don Mali kanw sèbèncogo la, o sèbèncogo kura ka kan ka ye «KIBARU» n'a nyègònnaw kònò, i ko «KABAARU», «XIBAARE» ani «JE-KABAARA».

Kabini tumajan, yèlèma donna bamanankan signiden damadòw sèbèncogo la, minnu tun ma don «KIBARU» sèbèncogo la fòlò, k'a da kow n'u cogo kan; nka san 1990 kònò «KIBARU» bén'o yèlèmaw tiimè dòonin dòonin fo k'u faamuya kosèbè a kalanbagaw bée lajèlen fè Mali kònò an'a kòkan.

O kòsòn, signiden kura kofolen ninnu bòli daminèra ni sèbènni kunbabaw ye san 1990 zanwuyekalo «KIBARU» kònò.

Taalen nyèfè, «KIBARU» nyèw bée bène sèbèn ni signiden kura ninnu ye, minnu filè nin ye:

Siginiden Kòròw	Siginiden Kuraw	Misaliw
è	ɛ	tègè : tege
ny	n	nyè : nè
ò	ɔ	mògò : mogò
ng	ŋ	ngana : nana

**KIM DJEUNG IL ka jaabi  
KUBA kunnafonisèbèn  
«GRANMA»  
ka nyininkaliw la**

KUBA pariti kominisi kunnafonisèbèn «GRANMA» kuntigi ye KIM DJEUNG IL nyininka KORE jamana konyèw bilama la. A ko jaabili kumaw filè :

Bèe b'a dòn ko KORE jamana ye sosiyalisimu jò gèlèya suguya caman kònò.

O sòròla marakojuguya walew de fè, minnu dara mògòw kan, na-fasòròko ani seko ni dònko sira kan, n'a kèra sababu ye, ka KORE jamana yiriwali nagasi, k'a ka nyètaa lasumaya.

Sosiyalisimu jòra KORE gèlèya minnu kònò, sègèn, san saba kèlè; jamana farali, k'a kè jamana fila ye; binkanni; karògèlènya anitòorò b'a gèlèyaw la.

Nka, baarakèlaw ka pariti ani yèrèlabèn kadara kònò, jamana denw sera ka kè jamakulu kelen ye, min bilasirala, Peresidan KIM IL SUNG n'a miirinata nyumanw fè.

O miirinataw waleyali siratigè la, lafiya basigira; sòrò yiriwara; sosiyalisimo ni kominisimu sankòròtara; fanga latèmènna jamana baarakèlaw ma.

Sisan, KORE jamana labènnenko nyuman nyèngoya b'a jugu suguya caman na, minnu b'a nyini, k'a ka sègèn don bògò la; n'u tèna se k'o baarajugu kè, bawo, KORE jamana denw sigilen tè, k'u bolo d'u sen kan.

KORE jamana kònòmògòw bée lajèlen jòlen bée Peresidan KIM IL SUNGani KIM DJEUNG IL kòfè cogo min na, u jòlen b'o cogo kelen de fana la, sosiyalisimuko, kominisiko, hadamadenyako, na-fasòròko; yiriwaliko, seko ni dònko kòfè ani jamana fan fila kafoliko, nyògòn kan, k'a kè jamana kelen ye, min bée wele «KORYO», n'a bée sigi koto-nyògontala kan, n'o ye demokarasi ye.

O dugujè, sigibugulakaw ye DALOLA kibuya kè u dalagèsè ye. Futufurufereyòrò la:

- ée, i m'a dòn duniya wuli min fòra, a sera dè.
- aa, ni mori ko duniya wuli sera, a tè fò a yèrè n'a ka walankolon kò dè.

- ée, nka karamògò y'ann silamèw bée jigi misènya.

- aw de tun bolo falen don a la, ne kòni tè, kabini ne ni kòkè ka kèlè la n'a k'o furabò tè nyè ni ne n'a ma jè.

- kana nin fò n' nyè na, jaa, biko t'a ta ye.

- Anw k'o kèlè furabòbaa kèra sonsonbugu alimami ye karamògò Bukari kònò.

- Muso o wala, i ka mugu kèra i bolo kari ye dè. I y'o ta si dòn; Nyèba nyininka banin.

- O bè n'a ta, o tè na sòn k'a denmuso nyinin; o tè bi cèkòròba ye dè.

- i jò n'ka dò mèn dè, a musonciniñ san tan ni saba de furula a ma ko alamandi. Kèlèkèlèbòorè kòrò o kòrò, tisolan bée sòrò a la. Sigibugu da-mubòyòrò la=

- Musow kòni tè kè fèn yé fewu, ni ne kòni ye n'ta fèn o fèn ye mori fè ye tugun, Mulutari ta in kò, o bée taa u ka so, o tè si.

- a morikèkakanan ninnu to yensan i'y'a mèn k'u nyògon jadò tè, nbòròn bòlen t'u judawo la.

- o tè wili, bari n'i'y'a mèn n'dalakilisi ka difoda ka mòsònyòrò sòrò dè.

- ka bée gèn ka bò denmuso falen nò fè ka tila k'i biri o kan soju la, èe, kòlònjugu jiri bée kari a yèrè kònò dè.

**Maanumanden ( laban )**

- nin ko in kelen b'a yèrè bolo dulokininkanba ye, a dògòkun tè nin ye sa a tè bò ni su tè.

- ée, a tè nin y'a yèrè bolo sa, ni kunatò ye se bolibasòn na, mun y'a yèrè nyòsònw tigè

Soju la, Ba-Mukutari kelen bée kelennakuma na :

- N'Dabamasa, ne dun ye mun kè ? Cibaa kanu kòsòn, n'ka walejuguw hakèto. N'sera n' nimògòmusow ma ani walimuso caman, nka Kajatuy'a ka nprotigya bée kè k'a ban, haali n'ma nyè kòròta k'a filè jango ka s'a ma. N'Dabamasa, e min nyè b'an bée la, n'tinyètigya nin kelen in na, Shèki Umaru Tijani Jalo mòdenya kanu kòsòn, cibaa kanu kòsòn, n'ka bato kanu kòsòn... Kalonyènama naani tèmènna, don o don dò bée fara Ba-Mukutari ka nògòfinneya kan; don o don fana dò bée fara Sigibugulakaw ka sigali kan; Cèkòròbaw baroyòrò la :

- Ne ma d'a la ni fa in nò dò, kowèrè bée sòrò kò in jukòrò.

- N'a tolila, a kasa na bò o, den kòni y'a fa de tògò fò.

- A m'a tògò fò, a ko de, a lakahila cogo min na, ko ka fa nyininka, bamanankan ka gèlèn dè.

- Bamanankan gèlèya b'o de nò fè, maa tè maa ta a tògò ma nka kuma fòra cogo ocogo, i b'i niyòrò y'a la. Anw kòni tè biden ye sa.

- wa, fa tè, n'e tè dòwèrè nyinin.

- Bo yen, fa don.

- Fa tè. - Fa don

- Fa tè - Fa don.

Olu y'o sòsòli kè fo k'u niyòròkèlè sòrò. Kajatu kònò girinyanen fo a bée na se jigin ye, a yèrè ye dunyògòn dò wele. Siginyògònka kòlòsili sera o ma :

- aa, ko bée sen na JALOLA bi dè.

- èe, du citò don, ko Kajatu kèlen bée ka jama wele k'a sigi.

- Kabako ! Ni maa ma sa ko bée juru b'i la, n'o tè, ne yèrè si bée la, n'm'a mèn ko muso ye cèjama wele k'o sigi kuma na, jango denmuso.

- òò, i ma Barò-nansi dontòye ka da Sonsorongu alimami kan.

- nin kòròfò in bée sumu bò, n'taara n'da walasa dugujè kana n'minè.

- nka maa bée taama, i bée segin ka ngunuma, nin bée ye Ala ka seebaaya ye. Jama dafalen JALOLA du kònò, Kajatu ye kuma ta, Baro-nansi ni kalifa. kèra kumalamènaw ye.

- Ne m'aw wele baasi la, bari kumafòlenkòrò tò ye dalamaa ye. Ne kònò in dara so in kònò yan, a ma se n'ka don o bée la k'o nyèfò a ye.

- Naamu

- Ne y'a to ni ne denfadònni sigasiga ye k'a da. ba n'a nyògòn caman ka juguya kan.

- Naamu

- Ne ka denmisènya kònò, ne ma foniyòrò si

sòrò min b'a to ni bée se ka n'yèrè sòn hakili la, maayabolicogów kan.

- Naamu, maa bée den dò wolo k'a lamò, o bée segin k'i lamò.

- wa, Ba ye n'terimusso minnu gèn ne nò fè yan, olu de ye ne sòn hakili la kònò in nyininkalidon mana se. N'terimusow.

- I fa tè, bunteni ka dògò nka a tè kuru ka bila jufa la.

- Bée ko ne ka du, ne ka du, i n'a fò ni duw daw bòlen tè ka bila bòlònw na.

- Naamu, dugu ye dugutigi ta ye, nka a bòlònw ye denmisènw ta ye.

- Ne ta tèmènna ni dimi caman ye nka dògòmusow bée n'fè. Ne kònò bée min nyinin Ba n'a nyògòn fè, u ka se u denw kòrò ni hakili ye k'u lamò n'a ma kè sibanbugoli ye bari, haali n'i ye wulu tòoro a b'i kin kuma tè mògò ma.

- Naamu, maaninfon balo tè tò dòròn ye.

- Ne den'in dun, fa b'a la, min tè so kònò yan bi, o siga ka bò aw bée la.


- Naamu, anw tulo b'i la.

- Afa ye cè ye, min bée se a yèrè kòrò k'a d'a ka baara sòrò kan, hòròn don a ka fantanya kònò, ne Kajatu Jalo b'o cè kelen in de fè n'o ye Cèfin DANTE ye. U bée da wagalen tora ten.

Amadu Tanba Dunbiya Bamakò (Mali).

# taama

## "UDPM" Sekeretèri Zenerali n Peresidan Musa TAR n'u nɔkanmc mara



K'a ta san 1990 marisikalo tile 8, fo ka t'a se a tile 17 ma, Mali kelenya tònba «UDPM» Sekeretèri Zenerali n'a fango so kuntigi, Peresidan Musa TARAWELE n'a furumuso Mariyamu TARAWELE, n'o ye Mali musow ka tònba «UNFM» denbatigi ye, ni nyémògò caman wèrew ye taama kè Moti mara sèkisòn 8 kònò.

Mali peresidan ni «UDPM» Sekeretèri Zenerali ka taama in, a bè bila nyögònbilasira kadara kònò, walasa cèsiri wale minnu nyinina Malidenw fè, olu ka sira sòro.

O cèsiri walew ye mun ni mun ye ?

O ye bèn ani kelenya ni kotonyògòntala yé, jamana kònò, kabini kubeda la, fo ka na se buguda la, pariti «UDPM» ani fango so n'a marabolow kuntilennaw lasoròli la.

O kuntilennaw ye mun ni mun ye ?

O ye dunkafa ye, hèrè ani lafiya, sòro ani kènèya, bèn ani kelenya kònò.

Peresidan Musa TARAWELE sera yòrò o yòrò, i ko : Tenèku; Yuwaru, Banjagara; Duwanza; Koro; Bankasi; Jene ani Moti dugu yèrè kònò, a ma foyi fò jamakuluw ye fasobaara kò. A ko faso tè baara faso denw kò; k'olu dòròn de bè se ka sòro n'a nafaw karaba, jamana yiriwali n'a ka nyetaa kòsòn.

O siratigè la, Moti mara sèkisòn saba n'o ye : Duwanza ni Tenèku ni Yuwaru ye, olu bilala pariti ka kòlòsili kònò

# nafama

## i Mali jamana fangaso Kuntigi AWELE n'a furumuso gòw ka Moti taama

bawo bèn tè olu sèkisòn saba ninnu kònò politiki nyémögòw ni fangaso nyémögòw cè, sanko ka se pariti ham-nankow tiimèli ma, n'olu baara kologirin dòw ye kungontanya kèleli, dunkafa ni ji kerenkèrenni ve sènè ni mado wérèw tè taa min kò. Moti ni Banjagara ni Jene sèkisòn nkana kòròw témèna ni pariti hajuw tiimèli ye.


O de kòsòn, olu ma b'u ka nkanaya la, nka dò faral'ukan n'oye, Koro ye min ka cèsiri ma kè sanjikòròwòsi ye, n'a wale-nyuman dòonna ni nkanaya jala dili ye a ma. «UDPM» sekeretèri Zeenerali ko nkanaya tè karaba k'a sòrò ka faso baara, a ka yiriwa, ka taa nyè, fo maledenw, cè fara muso kan, olu ka wuli k'u jò, ka wale kofolèn w b'u sira fè, i n'a fò

- Dunkafa nògòyalijamana fanbèe kònò;
- Sòròjèkuluw basigili, i n'a fò dugutònw;
- Ji kamaliko nyuman, ka hadamadenw ni baganw magow nyè n'a ye;
- Tasumadon dabilali, ka kungo lakana;
- Jirituru sèbè kèli, ka sanji ni nèema wele;

- Gakulunganaw cayali, ka tobilidògòko dògoya;
- Mali wolokanw kalanni, jamana kònò;
- Balikukan jènsenni, jamana kònò;
- Sènèfènw suguya cayali an'u lakanali;
- Sòròkèlaw bilali, k'u yèrèw ka kow nyènabò;

- Bèn ni nyògònfaamuya basigili, jama- denw ni nyògòn cè, politikow ni fangasokow latèmèliko nyuman na.

Peresidan Musa TARAWELE da sera nyinan balo cayaliko ma, ka se hakè la, min bëjamana kunnawolo, dunkafa sira kan.



# Kibaru kanubagaw

## Dòrògu

I ni sògòma, BaBurema!

Ba Burema: Ahaba, i ni sògòma n den!

E ye jòn ye?

Eè, Ba Burema! e ma ne dòn?

Ba Burema: Alahu Akibaru! Mun b'i la?

K'i nòorò tinyè tan. K'i fisifasa fò k'i bò mògòya sawura kònò tan!

Mun bònè binna i kan?

Sedu: N ka cè, na an ka taa. A ye dòn ko e ye dunan ye; ni o tè dugu bée ye Bubu ka dòròguta dòn.

Ba Burema: Mun? Dòrògu? N den i mago sara. E ma dòrògu tògò mèn halisa? Dòrògu tògò ka ca: a tògò ye yèrètacèn, yèrèmagosa, du-kunmasulibaa, somaamalo, faso-segin-kò.

Anw b'a fò dòrògutabagaw ma ko: yèrèdanbetinyènaw, yèrèlagosibagaw, yèrèdònbaliw, mògò lankolonw, fadensagow.

Ni maa o maa jugu kèra dòrògutala ye, i kana nyènyini-fura wèrè nyini a kama, bawo a kèlen don, k'a yèrè nyènyini fò k'a halaki

Dorogutabagaw, a' ye sabali a' k'a miiri k'a dòn ko aw ye faso so cèmancèjiri dò ye. O dun ni dòròguta tè bèn.

Bubakari JARA

Lakòlikaramògò ka bò

Segukura «A» lakòliso la

Segu (Mali)

## Nsiirin

Badenma cè fila wulila k'u bè taa musofuruyòrò la. Musonyinita in tun bè di kòròkè de ma. U tilenna ka taama, tile binna k'u to jiriba dò kèrèfè. U k'u bè si yen. U dalen su fè dògòkè sugora ko ni u ser'u buranna na, ni koliji dira kòròkè ma k'a ka t'a ko, n'a taara nyègèn na, a kotò, sa b'a cin yen, a bè sa fura t'o la. Nka, ni dògòkè fana ye a kòròkè lasòmi, k'a bali ka taa a ko nyègèn na, ale yèrè nyè fila bè fiyen. Dugu jèlen, u ye sira minè. U selen u buranna na, foliw ni minniw bannen kò, u jatigimuso taara ji sigi nyègèn na, ko kòròkè ka t'a ko. Kòròkè wulila k'a taa nyègèn na, a taatò lahara, a dògòkè wulila ka taa a minè a tègè ma k'a lasegin. A ye sugokan bée nyèfò a kòròkè nyèna. A y'a kòròkè bali ka taa a ko nyègèn na yòrò min, ale yèrè nyè fila fiyenna o yòrò la. Mògòw jèra ka taa nyègèn kònòna lajè, u ye nkoronko belebele janmanjan, finman, bilenman sòrò nyègèn kònò yen. U y'a faa. U sira, dugu jèlen, u y'u muso furu ka taa n'a ye. U ye san tan ni duuru kè, muso in ma den sòrò. A san tan ni wòorònan, muso nana garijègè denkè la. Den in bangelen kò san fila ni kalo wòorò, kòròkè fana sugo-

ra ko ni a y'a f'a muso ye k'a ka den in d'a ma, a bè den in kantigè, ni muso ye den in d'a ma, a m'a sòsò, a m'a nyininka, ni cè ye den kantigè k'a jolikènè kè k'a dògòkè nyèw ko, u bè yèlè u nò na. Dugu jèlen, cè y'a muso wele, a y'a laminè, a ko : «Naamu». Cè ko a muso ma, ko i bè den di n ma, n b'a kantigè. Muso y'a jaabi «ne ni n den bée de y'e ta ye, n'e ko min ka kè, o de bè kè. Hali n'i ko ne yèrè ka kantigè, n bè sòn. A ye den d'a cè ma. Cè ye muru ta k'a dadiya, muso ma kuma. Cè ye den da duguma, muso ma kuma. Cè in ye muru da den kan na, a y'a kan kòròta, muso in sigilen bè k'a lajè. Cè ye den kantigè k'a jolikènè kè ka filenba kura dò fa. A y'a dògòkè wele. Onana, a y'a nyè fila lako ni jolikènè ye yòrò min, o nyè fila yèlèl'u nòna. Ata y'a t'a ka masaya la, joli min bòra den na, min bònne bòra den na, min tora filen kònò, min bè cè tègè la, ani min bè muru la, olu bée yèlèmana ka kè jaman ni sanu ye. Joli min tora den kantigèda la, o kèra kòli ye, o ye den joginnida nòrò nyògòn na, k'a kè i n'a fò den in ma deli ka jogin. Den ma sa bilen. Ne Tenemori b'aw nyininka, n balimaw, jaman ni sanu ninnu ka kan ka di jòn ma mògò naani in na ?

Tenemori KAMARA  
ko "Eleman" KalasaSibi (Mali).

# Kuma yoro

## Nsiirin

Nin kèra cè dò n'a muso ye. Cè in tun ka jugu a muso ma. Don dò la cè y'a ka kulusi muguna labò ka n'a sigi k'o kala ni miseli ye. A tilala kulusi kalali la ka miseli sòori kulusi la ka nyinè o kò. A hakili nana jigin miseli la tuma min na, a nana miseli nyini ka t'a bila a bilayòrò la, a ma miseli ye. A sègènna miseli nyinini na, a m'a ye. A ye muso nyininka, muso k'a m'a ta; a ko muso y'a ta, muso k'a m'a ta, a ni muso ye nyògòn sòsò fo a bèna muso bugò. Kuma in digira muso la, a y'a tòorò fo muso dimina cè kòrò. Muso fana ko a ma miseli ye, Ala k'a ye. Nka ni miseli in bè ye, Ala kan'a dogo mògò si la, a ka ye jama bèe ka bò a kalamá. Cè in wulila k'a ka kulusi ta k'a don a la ka taa misiri la. Ale dun ye misiri alimami ye, jama bèe bò jò ale de kòfè. A y'a jò ka sali daminè. A ye kibaru fili ka kalan kè. A nana sujudu bin, ka alahu akibaru fò ka wuli k'i jò, ka tila ka alahu akibaru fò k'i tenturu duguma, k'i kun kòròta k'a b'i sigi duguma, miseli turula a bobara la, cè kulela k'a yera ! «a yera !» Misiri kònò mògò bèe ko a yera. Ala ye muso ka dugawu jaabi ka cè maloya misiri fa jama na.

N balimaw, aw ye hakilina jumèn sòrò nin baro in na.

Asitan TARAWELE  
Kibaru baarakèla  
Bamakò (Mali)

## Nyani

Nyani min b'aw kan, worodugu farafindenw, o y'an farafin bèe de hami ye. N balima farafindenw, bèe ka wuli, an k'an bolo di nyògòn ma ka ANC dèmè ni barikaba ye.

Dugukolo kan fènw bòlen bè nyògòn fè : dòw finnen bè, dòw jèlen bè; nin bèe ye dalimasa de ka wale ye. Ee ! anw kèra falatòw ye, an fadugu la siyawoloma de y'a sababu jugu ye. Bawo an siginyògòn teriw kèra an jugu fòlòw ye.

Farajè minnu bè farafinna dugukolo kan, olu ye siyawoloma kèlè ta ka s'anw ma, ko farafin ni maaya man kan, farafin min mana wuli k'an ka bèn kelen na, u b'o minè k'a faga, k'an tè kelen ye, u b'o minè k'o faga ko farafin ni mògoya danbe man kan.

«OUA» jamajèkuluw bèe dèsèra, dinyè seleke naani tòw bèe y'u seko kè. U k'u ni farafin tè jè ka baara, u k'u ni farafin tè jè ka kuma fò, u k'u ni farafin tè siya kelen ye. N'i dun ye ka jekòonin farinyanen ye ka digon fa nen, i b'a sòrò a jatigila ye kònòsogonti ka so ye.

Bawo maa caman b'u yèrè k'anw dèmèbaa ye, siyawoloma kèlè dèmèbaa ye, nka n'an ye dèmè nyini u fè ni maramafènw ye, u b'u ka dèmè kè ni

dalakuma ye; olu maaw ni siya-wolomanaw bée bée kulu kelen na.

N balima farafinna yèrèwolodenw, n'an ma wuli, jugu b'u sago sòrò an na dè !... Farafindenw bée ka wuli ka jè ka kè kulu kelen ye, ka siyawoloma kèlè ka bò an balima worodugu farafinw da la. N'o tè, don dò, jugu ninnu bén'u sago sòrò an na.

Mamadu Kulubali  
sòròdasi ka bò awiyònso la Bamakò (Mali).

## . ka bò Dèla

Nin ye Sanba Sangare ka lètiri ye n'a bè wele ko kawu, ka bò Dèla, Barawele mara la.

Ne nisòngoyalen ni n dusukun tòoròlen bè nin lètiri ci Dèla cè ni muso tògò la. ani an ka balikukalanso tògò la, ani ne yèrè kawu tògò la. An ye Seyidu Ture ka fatuli mèn, an bè dugawu kè ani a somògòw bèe ye, Ala ka hinè a la, Ala ka ya'a ma, cibaa kanu kòsòn, bi don lahòròma, salalahu Mahamadu wasalimu.

O tèmènen kòfè, nin ye an ka dugu samiyèko kibaruya ye.

Nyinan ji min nana anw fè yan, o cayara ni salonta ye, nka nyinan sòrò ma salon ta bò, nka o n'a ta bèe, an ye balow hakè sòrò.

An bè don min na i ko bi, an ka duguyiriwa tòn ka sanni kufòlò kèra, n'o ye kòorifeere ye. Sisan an ye nyògosi ni tigagosi kè.

Kibaruya min bè anw fè yan bi, o ye nin ye. An ka foli bè Arajomali baarakèla bèe ye.

Sanba SANGARE  
ka bò Dèla, Barawele  
mara la (Mali)

## " UDPM "

### ye san 11 soro

Mali jamana denw farala nyögòn kan, k'u ka kelenya sabatili tònba sigi sen kan, san 1979 Marisikalo laban na, k'a tògò da ko «UDPM», n'o ye fasodenw ka kelenya n'u ka kotonyögòntala pariti ye.

Kabini «UDPM» sigira sen kan, u y'a cèsiri labèn wale gèlèn dòw fè, n'o kèra jamana fangaso yèlèmako 2 nan Peresidan fòlò n'a depite jèkulu fòlò mògòw sugandili ye, wote senfè, min kèra san 1979 Zuwènkalo tile 19 don.

O Peresidan fòlò kèra Zenerali Musa TARAWELE ye, Pariti kura «UDPM» bangeli bòra min fòlò la, n'a haminankò fòlò kèra hèrè ni lafiya laseli ye Malidenw ma, kabini fanga ta waati, san 1968 Nowamburukalo tile 19 don,

Kabini Malidenw ka kelenya tònba «UDPM» sigira sen kan, san 1979 la, akuntilenna ma kè fèn wèrè ye hadamadènya sabatili kò, jamana galoduguw n'a cikèbugudaw kònò.

Labèn wale caman kè'r'o siratigè la, minnu kadara kònò, yèlèma donna ko caman latèmècogow la, i n'a fò:

- jamana fangaso kundoni fègèyali, ka kènyèrèyw fana bololabila fasobaarako la;
- cikèlaw labènni, k'u kafo nyögòn kan, dugutònw n'u nyögònnaw kònò;
- sòròda nafamaw matarafaliko nyuman, walasa yèrèlabòko walew ka sira sòrò;
- yiriwalikow ni nyètaakow kèli fasoden galabukènè kelen-kelen bée kunkòròko ye, yòrò bée la, kun bée la, cogo bée la ani waati bée la.

Nka, labèn kèra cogo o cogo, a tè sira sòrò gèlèya kònò, min farinya bë dinyè jamana bée kan sisan, n'a kèlen bë sababu ye, ka kétaw bali ka kè, setigi jamana ani dèsbagatò jamana kònò. O de kòsòn walew bë ka dafa ni fèerèw ye, minnu bëna kè sababu wèrèw ye, ka baaradaw ni baarakèlaw caya, kòkandèmè kadara kònò. Mali jamana y'o fèerè kura nafama waleya, k'a ta san 1990 feburuyekalo tile 28 don na, k'a

**baara bë soro, k'a d'a kan**

**Malidenw n'u dèmèbagaw benna  
fèerè 50 latigeli  
nafolo kan**

bil'a Marisikalo tile 3 la. A kèra kùnbèn de ye, min kènè kan, faso baarabolow ani kènyèrèyw ni dèmèbaga nyumanw bée ye nyögòn sòrò, ka baarako bolodacogow fèsè-fèsè, walasa baara sòròli ka nògòya mògò caman bolo, i n'a fò: denmisèn kalannenw, minnu kà dipulòmu b'u bolo; ani barrakèla faamuyalenw, minnu ka baaradaw datugunna ani minnu y'a kanu, k'u dahirimè nyini, u yèrèw ka timinandiya sira kan.

A kùnbèn kèra wasakoba ye, k'a d'a kan, Mali dèmèbagaw y'u bolo don fèerètigèlen 50 hakè latèmìliko nyuman kòrò, min nafolo kasabi ye miliyari 50 sòrò «CFA» wari la. A kùnbèn waleyaliko nyuman ma bala mògò la, k'a da Mali jamana fangaso kuntigi, Peresidan Musa TARAWELE yèrè ka cèsiri kan. O cèsiri ka kan, ka dusu kura don baara da kuntigi dèmètaw kònò, k'u ka baaradaw labèn konyuman; ka baaraminèn nyumanw sigi; ka baarakèla camanta; k'u barikaw fara nyögòn kan, walasa baarakèyòròko nibaa-rakèlako-gèlèya ka dò-bò jamana haminanko gèlenw na.

sòròdasiw fè, n'ale yèrè tun y'olu ka jèkulu kuntigi fòlò ye.

Pariti «UDPM» ka jamalajè minnu kèra nyögònfaamuya kònò, n'olu bë wele ko laadala kòngèrè ni kòngèrè balalenw ani pariti laadilijèkulu ka kùnbènw, olu sòròla ka pariti «UDPM» ni Malijamana fangaso marabolokowbila bolo kelen kan.

Sèkisònw, susèkisònw ani komitew labènna jamana fan bée kònò, walasa ka nyögònlasòrò nògòya pariti sanfèbolo n'a tòndenw bée lajèlen bolo.

O labèn walew labanna bënkansèbèn latigèli la, min bë tònden galabukènèw bilasira, ka dusukura don bée kònò, cè ni muso ani denmisèn, pariti haminankow waleyali la.

san 11 in kònò, o haminankow latòmòna nin cogo la

- Dunkafa nògòyali jamana fan bée kònò;
- Sòròjèkuluw basigili, i n'a fò du-gutònw;
- Ji kamaliko nyuman, ka hadamadèn ni baganw magow nyè n'a ye;
- Tasumadon dabilali, ka kungo lakan;
- Jirituru sèbè kèli, ka sanji ni nèema wele;
- Gakulunganaw cayali, ka tobi-lidògòko dògòya;
- Mali wolokanw kalanni, jamana kònò;
- Balikukanjènsènni, jamana kònò;
- Sènèfènw suguya cayali an'u lakan;
- Sòròkèlaw bilali, k'u yèrèw ka kow nyènabò;
- Bènni nyögònfaamuyaba basigili, jamana denw ni nyögòn cè, politikikow ni fangasokow latèmèliko ma, nyuman na.

Peresidan Musa TARAWELE da sera nyinan balo cayaliko ma, ka se hakè la, min bë jamana kunnawolo, dunkafa sira kan.

Walasa ka fasoden nyumanw wale-nyumandòn, Pariti ye Medayiko basigi kabini san 1989 la, n'o bënnna Pariti «UDPM» sanyèlèma 10 nan ma.

A jirala k'o bëna kè sababu ye tòndenw baarakèla tòw k'u nyèmada medayitigèw ma, k'u ladege, walasa Mali ka taa nyè, seginkò tè nyètaa min na, a yiriwali sira kan.